



Jofra Archer-i otsü tasen ka yangluogo

Ukraine parliament-i Zelenskyy lenisüba bhukumer

VOL. XXII ISSUE NO. 134 (ADOK 134) DIMAPUR YANGTEPNÜ (THURSDAY) TSÜKLAI (FEBRUARY) 27, 2025 ₹ 5.00

Ao Senden-i Dr. Neiphiu Rio nem tenüngsang agütsür

Dimapur, February 26, 2025 (TYO): Ao Senden-i Nagaland Chief Minister Dr. Neiphiu Rio nem tenüngsang tulu agütsüba metetdaksüogo.

"Tuophema nunger asür Guolhoulie Rio'er jabaso Neiphiu Rio-i public tenzükbä aser lenisüba atema degree of Doctor of Letters (Honoris Causa) anguba atema tenüngsang agütsür" ta Ao Senden Tir Marsanen Imsong aser Tongti Tezülur Imtipokym nati sangdong ka nung ashi.

"Iba akhümket degree ajanga Neiphiu Rio-i public tenzükbä nung shilem agiba aser lenisüba

kuli agütsür. 1989 nungi pa MLA ka ama inyaksü tenzükbä aser Nagaland nung Chief Minister kümük punguben tashi inyaka arur. Nagaland putiotsü nung pa Naga nunger tongtipang lennirtem rongnung ka lir. Onoki pa anema alitsü aser pa lenisüba kübok maneni takok ngua aotsü moatsür" ta Ao Senden mendenpurtemisa metetdaksü.

February 25, 2025 nü North East Christian University (NECU) mezüngbuba convocation agidang Chief Minister Neiphiu Rio nem Doctor of Literature, Doctor of Letters, Honoris Causa honorary degree agüja liasü.

Dimapur nung kitsükkirong lendong tuluka atalok

Dimapur, February 26, 2025 (TYO): Bodbarnü Dimapur kübok Naga Gaon Colony, Signal Basti nung kitsükkirong lendong tulu ka ataloka kibong 40 shi talidak maka kümogo.

Iba lendong ya tanep 11:40 ako meta atalok aser electrical short circuit ka adok asütsü akok ta osang angazüker.

Iba tesem nung LPG gas cylinders aika apokba ajanga mi tuluba küma kaoloka ki air rongdok ta tenük agi angurtemi ashi.

Iba lendong osang ya tanep 11:49 ako nung West Dimapur

Fire Station nem sangoktsü aser iba sülen West Dimapur station nungi fire tenders 3 aser Central Fire Station nungi 3 oa miji enseptet.

Iba tatalokba nung sen aika indang rongsen akoksaba dak alaka nisung asüba mesüra yiruyibongba osangbo kecha mali.

Osang angazükba agi mi mezüng adokba kidang nisung shinga maliasü anungji miji komaser adokar kuli kecha mengutet lir saka nisungtemi electrical short circuit ajanga adok asütsü akok ta jembir.

Chief Minister Rio-i 'apex tribal court' amenoktsü ayongzük



Kohima, February 26, 2025 (TYO): Naga nunger sobaliba ozüngtem ajungkettsüla aser mapang shitak nung temeten agütsüba den lawyers aser judiciary system nung senotsü tali meindoktsü atema tongti 'tribal court' ka amenoktsü nüngdaker ta Chief Minister Neiphiu Rio-i ashi.

Naga Heritage Village, Kisama nung Sekrenyi Festival cum Mini Hornbill benjung nung jembidang Rio-i iba tebilemba lemsatepogo.

"1873 nung British Parliament nung Bengal Eastern Frontier Regulation (BEFR) yangluba ajanga Naga nunger kümzüka ayu. Iba ajanga Inner Line Permit (ILP) system tenzükbä. British nungeri Naga nunger inyaksangshi aser sobaliba meraksadaksütsü atema Dobashis, DBs (interpreters) aser Goan Burahs, GBs (village chieftains) shimba inyakyim tenzüka yutsü" ta CM Rio-i ashi.

Naga yimten latettsü atema ajaki aginüaka India nüjiso anguba sülen Indian Constitution nung Article 371(A) enoksemba ajanga Naga nungeri maongkatem angur aser kümzüka ayur ta pai ashi.

Naga nunger sobaliba takar, inyaksangshi aser alemli nungi benshia aruba inyakyim kümzüka ayutsü atema state sorkari Hornbill Festival tenzükbä. Iba benjung ajanga Naga kin ajunga sabang ka nung adenshir aser pei pei senmang alima dang sayur, ta Rio-i ashi.

"Naga nunger benjungtem ajanga sobaliba ozüngtem aser inyakyim meyipa reprangshir saka state sorkari DBs Courts aser GBs courts ajanga customary laws ajungketnür. Naga kintemi pei pei customary laws bendenogo aser mapa küma inyaksü atema sorkar nem agüja lir" ta pai

metetdaksü.

Nagaland nung Southern Angami nunger aser Manipur nung Mao Naga nunger tsüngda Dzuko-Kezoltsa ali ken o ya High Court mesüra Supreme Court nunga mebandangtet saka Tenyimi Peoples Organization (TPO) okadak customary law ajanga angatettepogo ta CM Rio-i ashi.

Anungji iba mesükba tribal apex courts amenoktsü nüngdaker. Naga nunger sasep nung ken o tem item tribal courts ajanga angatetteptsü aser iba ajanga modern judiciary system dangi aotsü nüngdak madoktsü kechiyong iba nung advocates teyari agütsü atema sen agütsür, ta pai ashi.

"State sorkari taoba Village and Area Council Act melena Village and Tribal Council Act latetogo aser iba ya kobi melii benshia aotsü" ta Chief Minister Rio-isa ashi.

Implementing agreement nung sign masürtem mapa meinyakdaksütsü: Ao Senden

Dimapur, February 26, 2025 (TYO): Foothills Road mapatong tembanga inyaksü atema Ao Senden, Lotha Hoho aser Sumi Hoho-i pei pei telongtet nung Implementing agreement nung sign masüba contractor tem mapa meinyakdaksütsü bangjemtepa lir anungji Ao Senden telongtet nung tashi mangaba contractors nem mapa meinyakdaksütsü nenshia metetdaksüogo.

Iba bangzüng ya January 16, 2025 nü Mokochung nung renem aser ano February 4, 2025 nü Wokha nunga bangjemshio. Maneni February 7, 2025 nü PWD(R&B) Minister-i Kin Hohotem den senden amendant iba osang metetdaksüogo aser iba senden nung Engineer-in-Chief aser par ketdangsürtem dena liasü ta Ao Senden-i ashi.

Ao Senden-i February 26, 2025 nü Wati Lenjem (Yajang junction) nungi Wamakenyimsen yimtsüng tashi otsüsütsü aketba Nagaland Foothills Road yangluba semdangogo.

"Tanü tashi nung iba mapa kanga junga inyakba nguogo aser iba atema contractor Mongkum Jamir nem tenüngsang agütsür. PWD (R&B) Department Tuli,



February 26, 2025 nü Ao Senden-i Wati Lenjem (Yajang junction) nungi Wamakenyimsen yimtsüng tashi Nagaland Foothills Road yangluba semdangdang agiba noksa ka angur.

Langpangkong Tzükong Mungdang aser Wamaken Village Council-i onok meina senzüba atema kanga pelar" ta Ao Senden mendenpurtemi ashi.

Chief Minister Dr. Neiphiu Rio lenisüba nung Nagaland sorkar kübok Nagaland Foothills Road ya 2013 nung Kin Hohotemi tenzükbä aser atema sorkar dang pelar. Kümtem süia arudang state sorkari nüngdakba senotsü agüja arur aser Kin Hohotemi tentetba Nagaland Foothills Road Coordination Committee (NFHRCC)-i onok tenüng nung contractor tem den amalitepa aser yaritepa inyakba den kümzüka aruba atema tenüngsang agütsür ta Ao Senden-i ashi.

2013 nungi Foothills Road nung contract mapa inyaktertemi onok, NFHRCC aser contractors tsüngda implementing agreement ka nung sign sütepa arur. Onoki Naga yimten teloktem dang contractors dang tax mesarutsü aser ali kiburtem dang temenok kecha magii ali agütsütsü jembitepa arur ta Ao Senden-isa ashi.

NFHRCC-i onok tenüng nung Union Minister aser ano Nagaland Governor La Ganesan na den ajurutepa iba lenmang atema senotsü teyari meshio. Iba lenmang atema ali kibur karibo sen aika akoksaa ali tenlaogo aser iba ya NFHRCC ajanga inyakba liasü.

Talisa September 23, 2024 nü Community Hall Wamaken

Village nung senden amendant Wati Lenjem (Yajang junction) nungi Wamakenyimsen yimtsüng tashi lenmang re-alignment asüdag sen crore noklang aika akoksaa ali tenlaogo. Ali kiburtemi sen poisa ka danga magii ali tenlaba atema Ao Senden-i kanga pelar ta parnoki sangdong ka nung ashi.

"Tang Foothills Road atema sen arua mapa lemsar inyakdang contractor kari 2013 nungi benshia aruba inyakyim magizüker. Anungji Nagaland nung alirtemi tarutsü kümtem ano Foothills Road atema sen talila arudang koma inyaka aotsü shisadangtsü ayongzüker. Maneni, implementing agreement

nung sign masüba contractor temi onok den arua khuret lemsateptsü aser angatetteptsü ayongzüker. Naga nunger ta asüba tangatetba nung parnoki angateta memenui nüngdakba mapa inyaksü tamang lir" ta Ao Senden-isa metetdaksü.

Foothills Road mapatong tembanga inyaksü atema Ao Senden, Lotha Hoho aser Sumi Hoho-i pei pei telongtet nung onok den Implementing agreement nung sign masüba contractor tem mapa meinyakdaksütsü bangjemtepa lir.

Iba senden nung PWD(R&B) Minister-i tekaratiba nung NFHRCC den senden ka amentsü ta ashi anungji iba senden ajanga contractors aser Kin Hohotem tsüngda tekong merangtepba angatetteptsü teimla liasü, saka tang tashi PWD(R&B) Department-i senden mayonger, ta Ao Senden-isa metetdaksü.

Anungji, bangjemtepa aliba ama Ao Senden telongtet nung Foothills Road atema implementing agreement nung sign masüba contractors nem mapa meinyakdaksütsü nenshia metetdaksür, ta Ao Senden-i nenshiogo.

Kohima nung State Level Workshop ka ayongzük



Chief Minister's Mobile Operation Theatre (CM-MOT) surgical camp ka Pungro, Kiphire nung February 26, 2025 nü ayongzüka liasü. CHC Pungro nung sentong tatsüka agidang Advisor, S. Kiusumew Yimkhiung; MLA, Dr. Tseilhou Rhetso (Dr. Ato), district administration nungi ketdangsürtem, civil society nungi lenirtem aser Pungro sub-division nung aliba nüburtem dena liasü.

Dimapur, Tsüklai/February 26 (TYO): Ministry of Jal Shakti, Department of Water Resources, River Development and Ganga Rejuvenation, Minor Irrigation (Statistics) Wing, Government of India ajanga sponsor süa Chief Engineer Conference Hall, Water Resource Department, Kohima nung 7th Minor Irrigation Statistics (MIC), 2nd Census of Water Bodies and 1st Spring Census with reference Year 2022-23 indang State Level training & Workshop sentong ka February 25, 2025 nü Department of Water Resources, Kohima ajanga ayongzüka liasü.

Iba workshop tenzüka sentong nung Chief Engineer and Joint Census Commissioner, WRD, Er. K. Hutoi Sema menden liasü aser paisa Districts aser Block level nungi Census

operation takok ngua renemtsü asoshi team ka ama shima aliba District Nodal Officers, Block Nodal Officers aser Enumerators tem pela agizüka liasü.

Paisa tang agitsü aliba Census operation ya mobile nung amendaker NIC, New Delhi aser NIH, Roorkee ajanga yangluba App amshia agitsü, ta pai ashi.

Sentong tenzüka jembidang, Commissioner & Secretary, Department of Water Resources and Census Commissioner, Nagaland, Gregory Thejawelie, IAS-i shilem agirtem aser Training of Trainers (ToTs) tem dang saksalema field operation nung shilem agia data tejangja bendentsü ayongzük.

Scheme balala yanglutsü atema data bendenba ya tongtipang lir, anungji field level nung data aser osangtsüsang tejangja bendentsüla, ta pai

nenshia ashi.

Director, Economics & Statistics, Neidilhou Kreditsu-i ketdangsürtem dang Census Operation mapang source nung data bendentsü ajungshia liasü.

Census & Surveys ajanga real time data bendentettsü, ta paisa ashi.

Technical session mapang SE & Nodal Officer, Er. Sobu Angami-i 'Overview of the Censuses' onük nung ajemdaker jembi, Khriesatuo Kerets, DDS ajanga 'Village Schedule & Ground Water Schedule of 7th MIC' onük nung jembi aser Er. Krotso Koza, EE-i 'Surface Water Schedule, MIC, Water Body Schedule & Spring' onük nung ajemdaker jembia liasü.

Limaasem Aier, UDA aser Kashito Yeptho, LDA Cum CA nati Mobile Apps amshiyim sayu aser Kinazulu IOS ajanga melepzüng o jembia liasü.

ECI-i Chief Electoral Officers mungdang ayongzüker

Dimapur, Tsüklai/February 26 (TYO): Election Commission of India-i States/UTs ajunga indang Chief Electoral Officers atema anogo ana mungdang India International Institute of Democracy & Election Management, New Delhi nung March 4-5, 2025 anogotem ayongzüksü, ta Chief Electoral officer, Nagaland, Vyasana R, IAS ajanga sangdong ka nung metetdaksü.

CEC ama Gyanesh Kumar

inyak tenzüker iba ama mungdang tang mezüngbuba alitsü. Iba mungdang nung shilem agitsü asoshi DEO aser ERO shimtsü CEOs nem totuyuba agütsüogo. Aser statutory authorities ama CEOs, DEOs aser EROs ya State, District aser Assembly Constituency levels nung tongtipang ketdangsür lir.

Ananü mungdang nungya States/UTs indang election ketdangsürtem shisa

lemsateptsü aser tangazükba alitsü. Iba mungdang mezüng anogo nung IT architecture, osangtsüsang agitepba, social media outreach aser election inyakyim nung ketdangsürtem teinyaktsü shilem densema election management indang sensaksem alitsü.

Ananü buba nung States/UTs ajunga indang CEOs temi mezüng anogo sensaksemba nungi pei sasep action plan renemer lemsateptsü.

Showcase Scotland 2025 nung Naga nunger Bethel Tsuzu-i shilem agi

Kohima, Tsüklai/February 26 (TYO): Naga nunger kentener nübu tejangja Bethel Tsuzu-i Showcase Scotland 2025 nung ambassador aser delegate ama shilem agia liasü, ta Task Force for Music & Arts (TaFMA) ajanga Bohdbarnü sangdong ka nung ashi.

Glasgow nung aliba music industry sentong ka Celtic Connections 2025 nung shilem ka amai lir, kong Tsuzu ya international music professionals tem den sendakteptsü maongka agüja Scotland indang music scene balala ajangshia liasü.

Bethel Tsuzu ya nüburtemi kanga junga meteta aliba pianist, vocalist aser music educator ka lir, shibai Nagaland indang kenten-menüba tsütsü tongti shilem agia lir.

La ya Mountain Music Academy nung Director aser TaFMA kübok Bright Lights



First minister of Scotland, John Swinney-i Naga shawl ka agia aliba noksa nung angur, koba Naga tsür Bethel Tsuzu-i agüja liasü.

Children's Choir nung Artistic Director lir.

Tsuzu-i Young Musicians Award, Edgar Fewkes Memorial Trophy aser Nagaland nung Governor's Award densema sempet balala ngua lir. Showcase Scotland nung India nunger la kisüng aden aser linük

23 dak tema nisungi delegates 171 dena liasü.

"Anogo trok nung alima tesem balala nungi adenshiba nisungtem den tsendaktep yangluba, professional exchange aliba ya jangratemtsüka liasü. Hopta ka amungdang ni Scotland nungi kentener tajungtemi shilem agiba ni nguogo," ta Tsuzu-i meyipa shilangba sülen ashi.

Glasgow tesem balala nung sentong 300 dak tema ghonda aser minute shia agia liasü.

Bethel Tsuzu-i iba sentong nung shilem agiba ajanga TaFMA-i Naga nunger sempet tajung alirtem international sapang nung temaba jenjangi ajungkettsü asoshi inyakba tali jangjar.

"Asen state Nagaland aser asen linük India tenüng nung oa shilem agitetba asoshi temoatsü tulu nguogo," ta Bethel-i ashi.

District Hospital Dimapur nung atalokba NPMCC-i aitsür

Dimapur, Tsüklai/February 26 (TYO): District Hospital Dimapur nung nursing intern agir tetsür ka dak February 24, 2025 nü züka merenshiba asoshi aoksar aser kanga jashir, ta Nagaland Pradesh Mahila Congress Committee (NPMCC) sangdong ka ajanga ashi.

Manemertem anepalutsüba healthcare institution nung iba ama mapa tamajung inyakba ya magizükteter aser tematiba jenjang nung aitsütsüla.

Iba timtem ajurur alila aser lar kibong den onoki yariteptsü mulunga lir aser ochi obendang

meshiba civil society organizations, kaketsür telok aser tetsür telok den onok dena lir aser ozüng amshirtem dang tekeratiba nung aibelener dak tapet temerenshi agütsütsü ajungshir, ta NPMCC sangdong ajanga ashi.

Iba lendong yagi security tsütsü tamakok tulu aliba temai adoktsür aser tim ketdangsür dang mozüki aser public institutions nung nisung ajak aser talisa tetsürtem kumzüka ayutsü asoshi tapet mera agitsü ajungshir, ta sangdong ajangasa ashi.

Naga Gaon colony nung ki 30 shi rongdok



Dimapur, Tsüklai/February 26 (TYO): Naga Gaon colony, Dimapur nung Bodhbar anüngdang 11:50 ako meta kitsük-kirong lendong ataloka kibong 80 shi talisak maka kumogo.

Ajisüaka iba lendong nung nisung asü-amaba mesüra yiruba osangbo mali.

Fire station nungi ketdangsür kati ashiba agi, yinjong tonga

aliba jara ki timba sür ki 30 shi rongdoka kibong 80 dak kongshiogo.

Iba kitsük-kirong lendong ya electrical short circuit nungi tenzüki südi ta temulung melemi lir. Mi remseptsü atema fire tenders trok amshia ghonda asem shi agir remseptet aser iba lendong ajanga rongsen akoksaba ano masadangteti lir, ta ketdangsür-isa ashi.

Two-Wheeler Taxi Permits atema application meshir

Dimapur, Tsüklai/February 26 (TYO): Regional Transport Authority (RTA), Dimapur ajanga sangdong ka nung Dimapur, Chümoukedima aser Niuland nungi temsüa aliba candidate dang nungi Two-Wheeler Taxi Permits atema application meshir, ta ashi.

Transport Department ajanga sangdong ka agütsüba aser iba sülen RTA senden ka February 25, 2025 nü amenba sülen iba sangdong ya agütsü.

Dimapur atema permits 100, Chümoukedima atema permits 75 aser Niuland atema permits 25 lezmükja lir. Anungji jangra aliba candidate temi application ya pei aliba tesem nung Deputy Commissioner indang office nung agütsütsüla, ta sangdong ajanga ashi.

Application agütsür ya Nagaland lisopur Dumapur, Chümoukedima aser Niuland nung permanent residents asütsüla aser residence certificate ya pei alidak

administrative office nungi agütsüba agitsü aser arishi küm 20 nungi 40 tsünga alirtem asütsüla.

Application den külemi Aadhaar card, Indigenous Inhabitant Certificate, Schedule Tribe Certificate, Valid driving licence, aser Unemployment card agütsütsüla.

Taoba mapang apply sür aliba candidate temi format tasenba amshia tanaben apply asütsüla. Application gorms ya district asem indang DC office tem nung February 27, 2025 nü nungi agütsütsü aser March 11, 2025 tashinung application agütsüseptsüla.

Mabensaba applications tem magizüksü.

Shimtetba applicants tem two-wheeler riding test aser interview alitsü aser iba indang osang tejangja khen lir sangdongtsü, ta ashi.

Maneni permit alirtemi dang two-wheeler taxi anitsüla aser ibaji jangjatsü asoshi undertaking agütsütsüla, ta sangdong ajanga ashi.



February 26, 2025 nü New Delhi nung Telangana Chief Minister, Revanth Reddy-i Ato kilonser, Narendra Modi ajurua senden amendang tangokba noksa nung angur.

Aija alirtem yimtenren nung nokdangtsüji Parliament dak aket

New Delhi, Tsüklai/February 26 (Agencies): Ozüing alema inyakba ken otem nung aija aliba lenirtem taküm piyong yimtenren nung nokdangtsü atema Supreme Court nung temepishiba ken o agüja lir, aser iba dak sendakba nung Bodhbarnü Central sorkari, iba telemtetba agitsüji Parliament kübok lir, ta ashi.

Sorkari affidavit ka ajanga, "Taküm piyong yimtenren nung nokdangtsü mesüra menokdangtsüji Parliament nung telemtetba agitsüla," ta metetdaksü.

Advocate Ashwini Kumar Upadhyay-i ken o balala nung aija alir yimtenren lenirtem taküm piyong yimtenren nung nokdangtsü aser ozüing alema inyakba ken o benoka aliba

MLA asr MP tem atema tekeraba nung telemtetba agitsü atema Supreme Court nung temepishiba ken o ka agüja lir.

Iba dak sendakba nung Centre sorkari affidavit ka ajanga, legislative telemtetbatemji court nung mebenoktsüla ta Supreme Court-i aiben jembia aruogo, ta ashi.

Supreme Court nung ken o benokeri, Representation of the People Act, 1951 nung Arrla 8 kübok 'küm trok' ta alibaji taküm piyong ta melentsü atema mepishia lir.

Iba ozüing kübok taküm piyong yimtenren nung nokdangtsüji temerenshi tulutiba lir, aser iba ozüing benoktsüji Parliament dak dang keta lir, ta Centre-i metetdaksü.

Ken o benokeri Arrla 102

aser 191 ji tim masüba nung amshi, kechiyong item ozüingji ajanga anentsütsü asoshi ozüing yanglutsü atema Parliament nem tashi agüja lir, ta Centre-i ashi.

Iba tashi kübok Representation of the People Act, 1951 ozüing ya yanglua liasü, aser iba Act ajanga yimtenren lenirtem anentsütsü atema telatetbatem yanglutsü asoshi Parliament nem tashi agüja lir, ta Centre-isa metetdaksü.

Representation of the People Act, 1951 nung Arrla 8 aser 9 anema ken o benoka aliba dak sendakba nung Supreme Court-i Centre sorkar aser Election Commission na dang telangzüba agüjang, ta tuyua liasü.

AAP indang excise policy ajanga sen crore 2000 takoksa angu: CAG

New Delhi, February 26 (Agencies): AAP sorkar mapang benokba Delhi Excise Policy 2021-22 ajanga Delhi sorkari sen crore 2,000 dak tali takoksa nguogo, ta Comptroller and Auditor General (CAG) report ajanga metetdaksü.

Iba report ya Mongolbarnü Delhi assembly nung benoka liasü. 2022 küm July ita nung CBI-i ken o ka benokba sülen excise policy ya anena liasü.

CBI-i benokba ken o aser Enforcement Directorate-ia excise policy nung oshimashi bushisüngdangba ajanga Delhi nung BJP aser AAP na kanga

aitsütepa aruogo.

Iba ken o nung CBI aser ED-i taoba mapang chief minister Arvind Kejriwal, deputy chief minister Manish Sisodia aser Rajya Sabha MP Sanjay Singh nunger densema AAP lenir aika apu. Iba ken o nung tang par asemprongla bail nung chioka lir.

CAG-i 2017-18 kümsük aser 2020-21 kümsük nung Delhi sorkari indang excise inyakyim asadanga liasü. CAG report ya ita ter tejaklen Delhi LG aser Delhi sorkar nem agüja liasü saka assembly nung mebenok.

Tang Delhi Chief Minister Rekha Gupta-i assembly nung iba report benoka liasü.

CAG-i ashiba agi, Delhi excise department-i sen crore 941.53 takoksa anguba metetdaksüogo aser licence fee dak sendakba nung sen crore 890.15 takoksa nguogo.

Iba dak alia coronavirus wara dak sendakba nung tenokdangba balala ajanga sen crore 144 takoksa angu.

CAG-i, "Iba policy inyakyim tashimaitba nungi tenzüka kuli balala ajanga sen crore 2,002.68 shi takoksa anguba asadangtetogo," ta metetdaksü.



February 26, 2025 nü Navi Mumbai Police-i Mumbai tesem balala nung apuba temesepba mozü sayadang tangokba noksa nung angur.

Nepal NHRC-i KIIT nung azünger ka asüba bushisüngdangtsü akhanger

Bhubaneswar/New Delhi, February 26 (Agencies): Nepal National Human Rights Commission-i India NHRC dang Bhubaneswar nung aliba Kalinga Institute of Industrial Technology (KIIT) nung azünger Nepali tsür kaketshir ka asüba tatalokba bushisüngdanga asür nem temeden agüjang, ta takhangba agütsüogo.

B Tech student, Prakriti Lamsal ya soseta asü, ta tai tonglokja lir. Iba tatalokba sülen KIIT nung azünger Nepal nung kaketshirtemi longkak aيتدang parnok amak aser campus nungi meindoka liasü. Item tatalokba sülen Nepal sorkari India nung ketdangsertem dang tiyongsüi ia inyaksü akhanger.

Nepal NHRC-i sangdong ka ajanga, parnoki shidi ajanga National Human Rights Commission of India dang Nepal yimtiba, Kathmandu nungi Nepali tsür kaketshir ka asüba tatalokba jungjunga bushisüngdangtsü aser KIIT nung azünger Nepal nungertem nem tekeraba nung ochi temeden agüjang, ta takhangba agütsüogo, ta metetdaksü.

Parnokisa India NHRC dang Nepal nung kaketshirtem nem security agüjang aser iba tatalokba nung shilem agir

university ketdangsertem aser nijatem nem temerenshi agüjang, ta takhangba agütsüogo.

NHRC Nepal-isa India nung aliba Nepal Embassy dang iba tatalokba osang tejangja meshi aser kaketshirtem tang koba jenjang nung aliar osang tejangja metetdakjang ta tuyuogo.

February 22 nü Nepal Foreign Minister Dr Arzu Rana Deuba-i phone ajanga Odisha Chief Minister Mohan Charan Majhi den iba tatalokba indang metetpelaajembio aser Nepal nung kaketshirtem dang tim mesüi beshiba tesayurtem aser staff tem mapa nungi jendokang ta mepishia liasü.

Odisha sorkaria KIIT ketdangsertem dang Nepal nung kaketshirtem kecha tetsübu makai campus-i meyipa arutsü atema inyakang, ta tuyuogo.

February 16 nü Nepal nung kaketshirtem jagi Nepali tsür kaketshir tasü mangji parnok dang sayuang ta takhangba agüja longkak ait. Iba sülen KIIT staff kari Nepal nung kaketshirtem anema inyak aser institute-ia parnok hostel nungi meindoka liasü.

Nepal Ato kilonser K P Sharma Oli-ia iba tensa asadangtsü atema Nepal embassy nungi ketdangser ana Bhubaneswar yimti-i yoka liasü.



February 26, 2025 nü New Delhi nung Delhi Chief Minister Rekha Gupta-i National Commission for Women chairperson, Vijaya Rahatkar ajurudang tangokba noksa nung angur.

Bihar nung kobi melii election agitsü lia Cabinet ulushiogo

Patna, Tsüklai/February 26 (Agencies): Taküm November ita nung Bihar nung assembly elections agitsü lia Bodhbarnü Nitish Kumar-i aniba National Democratic Alliance (NDA) sorkari cabinet ulushiogo.

Cabinet nung BJP nungi minister tenet zü ngokogo. Minister ajakji kin balala nungi lir, aser ibaji ajanga election agitsü mapang ana nung lia kin ajak zü ngoktsü atema inyakba sayur.

Minister tasenpurtemji Jale menden nungi MLA aser Bhuminar lenir Jivesh Mishra, Bihar Sharif nungi MLA aser Koiri lenir Sunil Kumar, Amnaur menden nungi MLA aser Kurmi lenir Krishna Kumar Mantoo, Kewat lenir aser Arariya MLA Vijay Mandal, Sahebganj MLA aser Rajput lenir Raju Singh, Darbhanga MLA aser Marwari lenir Sanjay Sarawagi aser Riga MLA aser Vaishya lenir Moti

Lal Prasad nunger lir.

Bodhbarnep Bihar BJP Tir Dilip Jaiswal-i Nitish Kumar cabinet menden nungi anen, kechiyong party inyakyim nung 'nisung ka, menden ka' lir.

Jaiswal ya Revenue & Land Reform minister liasü. Nitish Kumar-i NDA nung adenba sülen yaküm January ita nung pa cabinet nung anioka liasü.

July ita nung pai Deputy Chief Minister Samrat Choudhary melen aser state BJP Tir aküm.

2020 küm Bihar assembly election nung BJP-i menden 74 angu, RJD-i menden 75, JDU-i menden 43 aser Congress-i menden 19 ngua liasü.

Tang Bihar nung NDA sorkar nung BJP, JDU, HAM aser LJP-RV lir, aser Mahagathbandhan teloktep nung Congress, RJD aser Left party tem lir.



TIR YIMYIM YIMOBILEM (EDITORIAL)

DIMAPUR THURSDAY, FEBRUARY (TSÜKLAI) 27, 2025

Asen kidanger nungi angazükdi

Linük tesem balala nungi takartem jaoka Assam nung parnok sen amshia terenlok mapa inyakdaksütsü asoshi atongba sentong tanabenbuba 'Advantage Assam 2.0' Guwahati nung anogo ana yakanü Tsüklai 25 aser 26 amongba mapang India nung takar tetsüti Corporate balalai pei sen amshia Assam nung arua amenoker mapa inyaksü nangzükba sen crore lakh ana ser tesadang dang nungi teimba kümogo. Ibaji sen aika. Iba senji amshia Assam nung rongsen poktetdaksüba mapa inyakbatem nung asenoka Assam nung asüyonga driver mapa danga ngunüali ta bilemtsüba tensa tia ka nung asenokbo lir. Pei sen crore lakh ana asem amshia Assam nung mapa tapu balala inyaksü nangzükba takar tetsütitem rongnungji Reliance, Adani, Vedanta, aser Tata Group teloktemi sen crore lakh ana dak tali endoka mapa inyaksü nangzükba lir. Iba sen nung jagi sen crore lakh 1.89 endoka mapa tapu balala inyaksü asoshi Assam government o takar company-tem na tsüngda tangatettep ken o, Memorandums of Understanding (MoUs), 114 sign sütepogo. Item sen amshia inyaksüba mapatem rongnung Reliance Industries nung mendenbuba, Mukesh Ambani kijai sen crore 50,000 amshia nuclear energy, food & non-food supply chains aser hospitality mapatem nung endoktsü nangzükogo. Iba denji ano, Tata Group nung mendenbuba, Natarajan Chandrasekaran-ia sen crore 25,000 amshia electronics aser mobile yangluba mapa tenzüksü aser ano Tata Power-ia sen crore 30,000 amshia anü aser tzu nungi electric tashi agizükba mapa, renewable energy projects, inyaksü ken o renemogo. Iba ama linük nung takar tetsütitem jaoka Assam nung mapa inyakdaksütsü asoshi atongba sentong nung ato kilonser Narendra Modi-i anir center nungi kilonsertem aser takartem rongnung Mukesh Ambani dena tsüngdong aruagi pei sen crore lakh junga amshia mapa inyaksü mulungtetbaji, Assam limaji tanga North east state-tem dang nungi tuluba aser tajungba asüba agi masü saka Assam tensa aser Assam nung aliba yimsüsür aser nübortemji tanga north east state-tem dang nungi tajungba, tesüngjemba, terajemba aser tangatetba asüba ajanga lir. Aji oda, Reliance aser Tata dak alaka ano linük nung rongsen bushia züindaksüba takar teloktem rongnung Assam nung parnok sen amshia mapa inyaksü nangzükertem rongnungji JSW Group teloki sen crore 7,000, Greenko Energies Pvt Ltd teloki sen crore 5,850, Adani Total Gas Ltd –i sen crore 5,000, Punjab National Bank Investment Services-i sen crore 3,000, Essar Group-i sen crore 2,100, OIL India Limited (OIL)-i sen crore 23,300 aser Numaligarh Refinery Limited (NRL)-i sen crore 10,711 jenjang mapa inyaksü tangatettep ken o renemogo. Iba sen crore lakh ana-asem endoka Assam nung mapa inyaksü ken o renemba mapang, asenok Nagaland nungbo government-i Foothill lenmang tatsüka yanglutsüba mapa nunga contractor-tem o Foothill Road Coordinatiion Committee na tsüngda tangatettep yanglutsütsü melen mangatettep adokdaksüba angur. Kasaji, Manipur nunga, akhi memesük, terenlok mapa tuluba inyaka aotsü melen Meitei nunger Schedule Tribe kümnüba agi Manipur kanga mesüngjemteti kümogo. Aji oda, asen kidangerbo pei lima nung rongsen züindaksütsü meranger saka asenokbo küm piyong benjong agi benjong maja benjong amongba agi alimabo benjong lima saka oda-oda benjonga memongtettsüsa sensaker lima kümogo. Aji oda, kodang asenok o tangar na medemdangdir, anüng o ali na amai, asenok Nagaland state government-i linük nung takar tetsüti company-tem nungi parnok senotsü sentong nung küm shia temeim mapa inyaksü asoshi parnoki aaba nungi 2% agitetba CSR sen agitsüba indang jembir saka Assam government-i Assam Advantage sentong ayongzükba yabo CSR sen meshitsüba masü saka takartem dang parnok sen aika bener arua parnok ajak kasasa ajangzüksüsa rongsen moluba mapa tulutem inyaksüba sentong indang jembir. Yangji asenok shisa tenük lapoka angazüksü mapa aika lir.

OLEMSABANG

TAMANGER TAJUNG KATI KODA ARTIFICIAL INTELLIGENCE ANGATETTSÜ

~ Akok Amer, Pastor: Impur Baptist Arogo

(Yashi adok nungi...)

Based on the Functionality of AI- Type 2

- * Reactive Machines: Iba ya IBM company 1980's nung yangluba program, koba ajanga taoba mapatem nung yaritsü atema masü saka tang agitsü atema koba dang 'reactive' ta ajar. Tatishitsü agi, rule-based system nung chess program installssüa amshiba ama.
- * Limited Theory: Iba system ajanga taoba mapang koba program install süa ali, item ajanga information teyari agütsüba mesüra store süa ayuba data aser sentongtem lir.
- * Theory of Mind; Iba system ajanga decision making nung meimchir shisatsü dang nungi alema oa teyari agütsüba,
- * Self-awareness: Iba system nungbo meimchir level nung teshisadangba (consciousness) aser rajema aliba system ka lir. Ajisaka ya tanü tashibo shitakba nung masü saka fictional nung dang ta jembir.

Tamangba Yimsü Ajanga Kechi ashir

Tamangba ren nungi talisa theological tangatetba tsütsü kodang aroka shisadangtir iba AI system yagi Tsüngrem den asayar ama ka lir. Kechiyong obangtsüker (critics) ajanga ashiba agi iba AI yagi meimchir mesükba shisatsü ajanga Tsüngrem shisatsü, pa temeshiba tashi aser tangatetba den toktepa amai lir ta ashir.

Tsüngrem temeshiba aser tematiba tashi (sovereignty) AI ajanga decision -making amshiyim tsütsü theological concerns ka adokdaksür. AI ajanga telemtetba ajak agütsüra tamangba yimsü, theological principles aser libaliro tazükba (morality) den obang mapu akümtsü. Kechiyong teyanglur Tsüngremkübok meimchirtemi kümdanga tematiba tashi agütsüsang Tsüngrem aser pa lenisübanung alitsü meranger. Tsüngremer tekümtet otsü kodanga AI ajanga takok magutsü. Hau! AI ajanga data collection aser telemtetba programmed kar pa dak aketba algorithms aser pattern kati agütsütettsü akok. Saka Christian moral teaching aser principles tem asoshibo tamakoktsü asütsü.

AI technologies ajanga tekülem sentong programed süa alibatem inyaktetsü akok, kibuba benjong agütsütsü akok, sarasadem, funeral services, temeshi kiyimba kulizüng tem agütsütsü akok (those which can be programed). Saka, mezütsüa shimtetba Tsüngremer nisungtem jenjang kongi aotsü, iba khuret aser tenzüksü asoshi nungloksüba wadangtem machine ka nem nungloksütsü Tsüngrem chirtemi koda agizükettsü. Meimchir o meimchir na tsüngda tenzüktepa aliba kotasür virtual, remote-control ka amer koda melenloka toktsütsü. Shibai baptitsütsü! nisung asü machine? Shitakba tzu nung baptitsüasü virtual (screen) nung baptitsü? Screenaserrobots amshia baptira, digital taochi ka angutsü saka Tsüngrem tekümtet taochi koda asadangtsü.

Tashitemeteteri kari yamai ashi,

Joseph Bass, "A.I. will become the new idol. God dwells in man through his spirit. God does not dwell in machines."

Charles Robertson, "The relationship between AI and humans will always be creator (programmer) and created(program). As such, any AI program and its actions will be the sole responsibility of its programmer(s). As a man-made entity, AI, no matter what level of super intelligence it may achieve, will always be imperfect. Accordingly, AI can never be trusted to represent a more accurate interpretation of the Bible than that which we discern."

Tim, "Just because something is available to us doesn't mean it is wise to use. All the ads I see for AI talk about 'leveraging' and all other types of business lingo. We are soon moving out of the realm of letting the Spirit guide us and have human interaction. The next step will be wearing goggles for virtual church. There are times to unplug and minister to people. AI is exciting, but it's not a tool the body of Christ 'needs' everyone needs to ask themselves if this is healthy and necessary. Top of FormBottom of Form

I have wondered if The Antichrist, when it manifests, might turn out to be an artificially sentient being."

Iba AI ajanga kodang tamangba yimsü nung kongshitir Tsüngremer tekümtet otsü melenshitsü, lai tetuyuba, aser küm aika meimchirtemi benshia aruba Kibubar inyakyim melenshitsü. Tsüngremer mangdang aser tetuyuba sama aotsü, maneni teyangluba Tsüngremer chir ka ama asen rangben taküm: shi aser tanela nung Tsüngremer sentong asoshi tetezü ka malitsü, nükjidong malitsü aser tekümtet otsü samatsü ana nung dang lir.

Top of Form

Bottom of Form

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Thailand nung Montagnard nunger Khristian refugee 60 apu



Thai Police-i Vietnam nungi Montagnard nunger Khristan 68 apuba sülen parnok dang asüngdangyaba mapang tangokba noksa nung angur.

February 26, 2025: Vietnam nungi aruba Montagnard nunger Khristan 60 dak tali Thailand nung puogo; February 23 nü Thailand yimtiba, Bangkok nung Khristan refugee temji apu, ta International Christian Concern (ICC)-i metetdaksü.

Montagnard nunger tamangertemji asüpila sentong ka agidang sarasademba den külemi tekülem sentong agiba ajanga parnoki timtem agütsü, ta Khristantem nem tai tongloksü.

Khristantem jagi judge ka ajuruogo, ajisüaka parnok

teimbakati bail atema sen magütsütetsü, anungji jail nung dang alitsü, ta ICC-i metetdaksü.

Thai police-i mezüngbu Montagnard nunger Khristan 68 apu, ajisüaka Thailand nung alitsü temelaba ngua alirtembo chiok.

Thailand nung apuba Khristantem rongnung Montagnards Stand For Justice nungia züngsem 27 densema liasü. MSFJ züngsem kar ket nungbo refugee cards liasü.

Yaküm Vietnamese Ministry of Public Security-i MSFJ telok

ya kiralongrar organization ka, ta sangdonga liasü.

Vietnam nungi Khristan refugees aika Thailand nung jenoka lir, aser parnok aikati anogo shia timtem balala ajangshir. Thailand nung Vietnam nunger refugee 4,000 dak tali lir, aser parnok teimbaka yimsü nung reshikangshiba maremtetba ajanga Thailand nung arua jenokba lir.

Vietnam nungi Khristan refugees aikati linük balala nung jenoka alitsü asoshi refugee jenjang angutsü atema küm aika atadar.

Alpha Canada course ajanga nisung 50,000-i Yisu den tesendaktep yanglu



Shaila Visser

February 26, 2025: Yaküm evangelistic Alpha Canada course agiba ajanga Canada nunger 50,000-i Khrista nem bendanga agütsü mesüra tesendaktep yanglushi, ta February 21, 2025 nü Alpha Canada Impact Report 2024 ajanga metetdaksü.

Iba course agirtem rongnung China nunger aser China nunger lanurtem-a aika liasü.

2023 küm den medemdangra yaküm Alpha course agirtemji shilem 13 agi teimba liasü.

Yaküm nisung 119,981-i iba course agi aser nisung 52,281-i Khrista nem taküm bendanga agütsü, ta kasa report ajanga metetdaksü.

Alpha Canada national director, Shaila Visser-i, "2024 küm ya research aika agiba küm ka liasü," ta metetdaksü.

Laisa, Alpha Canada-i Flourishing Congregations Institute den longjemer Canada Arogotemi Khrista osangtajung

prokba nung shilem agiba jenjang bushisüngdanga liasü, ta ashi.

Christian Daily International report ajanga ashiba agi, Arogo lenirtem shilem 72-i pei Arogotem nung tanela atema tejangraba tulu nung inyakba bushiteta liasü.

"2024 küm Alphas-i ketdangsüa linük tesem ajaklen schools, rejutem aser Arogotem nung Alpha sentong 5,194 agiogo. Canada tesem ajaklen Tsüngremi mapa inyakdar. Onoki yaküm May ita nung U.K. Leadership Conference nunga Canada nunger 270 jaoka liasü," ta Shaila Visser-i metetdaksü.

"Chinese Alphas atema onoki kanga takok ngua inyakogo aser Alpha for Prisons asentenshir tanaben tenzükogo," ta lai metetdaksü.

Chinese Alpha nungji Arogo 244 nung Chinese Alphas 566 densema liasü aser iba nungji

Arogo lenir 261-i shilem agi.

Tang Canada nung China nunger million 1.8 shi lir aser ibaji ajanga Alpha lenirtemi China nungertem rongnung Alpha resources nüngdak apiteta inyaker. Item ama resource rongnung 2022 küm tenzükba Chinese Alpha Film Series densema lir.

Ano külen yaküm November ita nung lanurtemi tenzükba Alpha Youth Series ajanga lanurtem tamang jenjang ainer aser terataba balala metettsü janjar.

Visser-i, "Tan putu nung lanurtem aika Yisu ajanga kongshir aser lanurtemi pei medemertem den Khrista indang lemsateptsü janjar," ta ashi.

"Iba putu ya lenirtem putu! Alpha Canada-i parnok indaktsütsü aser local Arogotem yaritsü atema inyaker. Tan putu nung asen linük nung temelenshi adoktsü," ta lai metetdaksü.

Yaküm October ita nung Arogo 19 aser denomination 10 nungi Arogo lenir 31 desema St. Paul's Bloor Street nung sentong ka agia liasü. Iba sentong nungji tanur aser lanurtem atema sarasademtsü aser The Worship Project den tekülem agia liasü.

2025 küm nunga maneni Tsüngremi Alpha Canada amshitsü imlar, ta Visser-i ashi.

"Tsüngremi mapa inyakdar aser onoki Pa den külemi jajar. Iba ministry ya tanela nem anidaktsüba ministry ka aser Pai melungba ama inyaktsü," ta laisa metetdaksü.

ANOGO ABEN TSÜNGREM DEN

Menokdangtetba Army

"Idangji ni ajaba anogo nung kü tsükchirtem meyipa aotsü; ya ni metet, Tsungrem ni asoshi lir". (T. Ken 56 :9)

Kodang iba ama tayimtenba kotakleni yoker, "kü tsükchirtem meyipa aotsü." Atsüka aliba aser menokdangtetba army-i ni atema asayatsü tenzüktsü, aser parnok tashi tamakok angutsü. Au, amanga sarasademba ajanga tenük agi manguba semloker tongpang rara-i jaoker. Tenemtemji raraba kor agi sünga lir aser anasa mi talungtsüi meketbanga lir! Aser tsükchirtem jena aor.

Ibai ajanga ni metettsü. Tenüngsang ken züluri pai ajangshia aruba manung pa tamang yanger. Noklang bena sayatenya atalok. Anepdang shia pa anasa tsükchirtemi raraba janzü amajok nung apuba pai angashia liasü, aser pai Kibuba dang ayimten, aser amjang arudang idakji lenmang sadema lapoka liasü. Shibai temulungjang tajung agi Kibuba den inyaker pa temoatsü, pai dang tejangja tamang agi anemertem den ajuruteptsü akok !

Uganda nung Khristan sayutsüngir ka den Khristan 3 dak azük



Robert Kasozi

February 26, 2025: February 15 nü Uganda nung Muslim yimsü alia amangertemi Khristan sayutsüngir ka dak azük aser kotari agi yirutsü.

Moapu nung sentong ka agidang sayutsüngir den pai aniba team-i Muslim nunger amitsür ka Khrista dangi anir aruba sülen Muslim nungertemi tejashi nung pa dak azük.

Mukono District kübok Kiwanga yimdark arrshi küm 39 sayutsüngir, Robert Kasozi dak tebok nung kotari agi tsüngoktsü aser pa den külemi inyaksemer asem dak-a azük.

Moapu ka nung sentong agiba mapang nung Khristantem jagi Muslim tsür arrshi küm 75 amitsür, Hasifa Khrista dangi anir aru, aser ibaji ajanga par kinünger ka kanga jashia liasü.

"Hasifa'er kinünger Jawadi-i ajakji kuli süa anguba sülen pai dokan nungi Islamic yimyim ayima alu. Iba sülen Muslim nunger aika adenshia sayutsüngirtemji mezüngmeshi tenzük," ta osang ka ajanga metetdaksü.

"Iba mapang nungji Muslim nunger kati Robert Kasozi dak

tebok nung kotari agi tsüngoktsü. Tangartem jagi 'nenok mamangertem, iba yimti ya Muslim nunger meyong' ta nenoki memetet asü? Nenoki inyakba mapa ya anenang, kechiyong Yisuji Tsüngrem chir masü saka onok ainkar Muhammad ama osangbener ka dang lir ta ashi," ta lai metetdaksü.

"Robert Kasozi azü yima ali nung ondaka alidang tanüngba Muslim nungertem jagi Khristan asem dakji azük. Parnoki Laishiba-a rakzüker shisatsü," ta lai metetdaksü.

Robert Kasozi den külemi inyaksemer Khristan asemji arrshi küm 27 Alice Nanduja, James Bazanya aser Frank Biribawa nunger liasü.

Khristan pezüji kanga mejungi yirur lia mamatzü ayoker nisung trok motorcycle nung arua parnok yari. Ano külen dokan nung security guard kati injang khadokba sülen ang Muslim nungertemji iba tesem nungjagi jena ao.

Kasozi tang hospital nung treatment agia tajungba kümdar aser pai aibelenertem anema ken o benoktsü, ta shiogo.

AO OSHI ANGAZÜKDAK:**TANÜ ANGAZÜKTSÜBA OJANG****Tekinungbo**

(n) la meyong kinungbo ta ashiba (her husband)

* Tekinungbo nisung tajung ta lai ashi.

Tekinungtsü

(n) pa meyong kinungtsü ta ashiba (his wife)

* Tekinungtsü soruchioktsü nung kanga junger.



Tir Yimyim

OLONG PAITEP # 7075

1			2		3		4		5
6		7							
					8				
9				10					
					11				
			12						13
	14							15	
					16				
			17						
								18	
19									

TIPIEN

- | | | | |
|-----------------------------------|-------|--------------------------------|-------|
| 2. Teburtemi tejak nung awaba | - (8) | 1. Temejangdak | - (6) |
| 6. T _ _ _ em | - (3) | 3. Nisung ka mapa inyaksü nübo | - (4) |
| 8. Tzüik ayudak | - (3) | 4. Azüntsü asoshi mejemba | - (6) |
| 9. Nüngdakba dang timba | - (6) | 5. Tesangwa agütsüba | - (5) |
| 11. Züina ao | - (4) | 7. Tila masü | - (4) |
| 12. Yangi tzü angur | - (5) | 10. Tebenjem tetsür chanu | - (4) |
| 14. Tangar dang nungi tali | - (4) | 11. Tekolak nung inok | - (4) |
| 16. Senyong masü | - (6) | 12. Tetsüngda | - (6) |
| 17. Oadokdi | - (3) | 13. Tangar inyakba ka inyak | - (6) |
| 18. Tzü tarok | - (3) | 14. Tim masü ta ashi | - (5) |
| 19. Yimtakir aikati iba ya ki den | - (8) | 15. Asalendong | - (4) |
| külemi yanglusemer | - (8) | 16. Tanüdagtsü | - (4) |

LANGTSÜNGLEN**OLONG PAITEP # 7074 TELANGZÜBA****TIPIEN :**

- | | |
|--|-----------------------------|
| 1. Telok, 4. Aluru, 6. Ozüing, 8. Emk, | 1. Tenükjang, 2. Luden, |
| 9. Kin, 10. Teti, 12. Süir, 13. Jen, | 3. Kiochtsü, 5. Lenti, |
| 14. Ola, 16. Talak, 17. Mazük. | 7. Tajangzüik, 11. Teronem, |
| | 12. Sempa, 13. Jahaz. |

LANGTSÜNGLEN :**NAI-A YA METETTER MA**

British nunger endurance athlete Sophie Power-i anogo ananü nung 365 km (226.8 miles) asemteba ajanga otsü tasen ka yangluogo. Taküm January ita Birmingham, England nung National Running Show alidang lai treadmill nung running & hiking asüdag iba otsü yangluteta liasü. Ajisüaka Guinness World Records-i tang tashi nung iba otsü atema ano kulikaket ano magütsü lir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Shiva Sena-i Manipur Governor dang mapa timi inyaksü ayongzüik

Imphal, February 26, 2025

(Agencies): Manipur State Unit Shiva Sena president M Tombi-i Governor Ajay Kumar Bhalla dang tejak mereprangi prangpong-injang meypa agiba maparen inyaksü ayongzüikogo.

Central aser state forces-i counter-offensives inyaka aruba ya külen tsütsü dang shir inyaker ama ajiteter ta Tombi-i ashi.

Telungpurtem aser ozüing alema inyakerem apuba den külemi prangpong-injangtem

anguba ya Manipur kübok valley district tem nung teimba inyakogo ta media osangtem ajanga ashir.

"Governor-i tensa süngjemtsü atema ozüing alema bener aoba prangpongtem meypa agütsütsü ayongzüikba pelashishia agizüker saka hill districts nunga ozüing alema inyakerem aser telungpurtem anema inyaksüla" ta M Tombi-i ashi.

Prangpong kecha maliba

yimdaklirtem aser talisa Meitei nunger kümsüka ayutsüla aser telungpurtemi yimdaklirtem tepsetra iba tebilemtsü khuretji Governor-i abentsü ta paisa ashi.

Security forces-i anogo matongdang village volunteers anema mapa inyakba aitsür. Iba ajanga Manipur Governor sorkari yimjung mapa inyakba nung timtem ajurutsü aser tensa tamajungba akümtsü, ta M Tombi-isa metetdaksü.

Meghalaya nung Viksit Bharat Youth Parliament ayongzüiktsü

Shillong, February 26, 2025

(Agencies): Meghalaya nung Viksit Bharat Youth Parliament district-level rounds agitsü atema reju pungu shimtetogo.

Linük ajungalen sentong agiba atema registration tanü agi anogo anabuba agiogo.

East Khasi Hills district atema NEHU, South West Khasi Hills atema Sngap Syiem College, West aser East Jaintia Hills districts atema Don Bosco College Byndihati aser Eastern West Khasi Hills aser West Khasi Hills regions atema Mairang Presbyterian Science College shimtetogo.

Maneni, Ri Bhoi district

atema Ri Bhoi aser Garo Hills districts pungu atema Tura Government College shimtetogo.

Viksit Bharat Youth Parliament district-level rounds atema yashi nungi registration tenzüka liasü aser March 9 tashi agitsü. Iba tetoktepba nung arishi küm 18-25 tsüngda alirtemi parnok application den one-minute video ka agütsütsüla.

Taküm Viksit Bharat Youth Parliament ya taoba formats dang nungi balaka asütsü. Taküm tetoktepba ajak offline nung agitsü aser district nungi state aser tatemsa national levels tashi telemsa asem yur agitsü.

District level nung shilem agirtemi English mesüra Hindi nung minute 3-4 nung "One Nation One Election: Paving Way for Viksit Bharat" onük jembitsü.

State-level competitions nung shilem agirtemi constitutional themes aser Parliament of India nung national finale nung electoral reforms aser governance lenmang bushiteptsü.

Iba sentong ya Prime Minister Narendra Modi'er mangdang ajanga ajungmesoa agir. 2047 India development goals nung lanurtemi policy discussions nung shilem agitsü atema iba sentong agir.

Nagaland CineFest

CELEBRATING STORIES • INSPIRING MINDS

DAY1

28.02.2025

DAY2

01.03.2025

Time	Hall 1	Hall 2
10:00AM - 11:00AM	Inaugural	10:00AM - 10:45AM Masterclass: "Why some edits feel right: the psychology of editing" - exploring how human perception influences editing choices. -Moses Marks, Singapore
11:00AM - 11:35AM	Hall 1 Eleison (Have Mercy) 24mins Dir. Raymond Colney, Mizoram	10:45AM - 11:25AM Hall 1 The Untiring Woman 30mins Dir. Maibam Amarjeet Singh, Manipur
11:35AM - 12:20PM	Hall 2 Masterclass: "The evolution of film editing: cinema to digital age". A historical journey through major editing techniques and innovations. -Moses Marks, Singapore	10:45AM - 11:30AM Hall 2 Masterclass: "Editing for emotion: How cuts can make audiences laugh, cry or feel suspense"-The emotional impact of different editing styles. - Moses Marks, Singapore.
12:20PM - 01:00PM	Hall 1 Chanchisoa (Expectation) 30mins Dir. Elvachisa Sangma, Meghalaya	11:30AM - 12:45PM Hall 1 Andro Dreams 1hr 03mins Dir. Meena Longjam, Manipur
01:00PM - 01:45PM	Hall 2 Masterclass: "Nagaland, New Horizons" - Bendang Walling, Nagaland.	12:50PM - 01:30PM Hall 2 Masterclass: "From script to screen: Evolution of story" - Dominic Sangma, Meghalaya
02:00PM - 03:00PM	Hall 2 CineConnect - A conversation with Bendang Walling, LC Sekhose, Khrieville Suohumvü, Kikru Nelka and Mr. Smile.	01:45PM - 04:00PM Hall 1 Yong 1hr 40mins Dir. Tiakumzuk Aier, Nagaland
03:05PM - 04:30PM	Hall 1 Paper Airplanes 1hr 14 mins Dir. Moses Marks, Singapore	04:00PM - 05:00PM Hall 1 Valedictory

SCAN FOR LOCATION

EVENT MANAGED BY:
LIVONOW

Ukraine parliament-i Zelenskyy lenisüba bhukumer

Kyiv, Tsüklai/February 25 (Agencies): Tir Volodymyr Zelenskyy lenisüba bhukuma Ukraine indang parliament züngsem ajungai pangzüng ka yangluogo, anungji rara nung aliba linük ya tir election agitsü mapang atsülangba ajanga constitution nung aibelen mali ta jangjatsür.

Mongulbarnü parliament senden alidang züngsem 268-i mulungsoa iba pangzüng agizüka vote agütsü aser dangar züngsem 12 senden nung meliasü.

Iba pangzüng ya parliament nung lenirtemi Zelenskyy bhukuba temaitsü sayua yanglu, shiba indang kümsük May ita tembanger.

Taoba hopta US Tir Donald Trump-i Zelenskyy ya "dictator" lir ta aitsü, kechiaser pai küm ishika election magi arur, aser kasaji Russia Tir Vladimir Putin-ia taoba mapang shia liasü.

Ajisüaka Ukraine nunger ozüng kübok linük tesem ajunga nung martial law ali tashi election magitsü shia lir. Russia-i 2022 küm February ita nungi Ukraine amak tenzükba sülen martial law ya sangdonga lir.

"Verkhovna Rada-i ano maneni Ukraine Tir Volodymyr Zelenskyy ya talenba mali, ochi aser democratic elections ajanga shimetet ta sangdonger. Pa inyaksangshiba ya Ukraine nübur mesüra Verkhovna Rada ajanga mashishir," ta pangzüng

nung shia lir. Iba pangzüng yagi Ukrainian constitution indang Article 108 athishia liasü, kong tir inyaktsü shima alisangi office magizük tashi tang inyaka alisang ya linük tekolakba ama alitsü shia lir.

Trump-isa Ukraine lenir ya polls nung "approval rating" shilem 4 dang lir ta ashi, koba Russian media osang nunga kasaji shia liasü.

Ajisüaka tan ita Kyiv International Institute of Sociology ajanga survey ka agiba nung Zelenskyy indang approval rating ya shilem 57 liasü.

Russia-i amak tenzükdang approval rating shilem 90 aliba nungi ajema akumba asüyonga, iba ya ajanga Zelenskyy-i pa tim nung tir inyaker ta sayur, ta institute ajanga ashi.

Mongulbarnü Ukrainian parliament nung vote agitepba ya anogo ka tejakdang agia aliba melenshiba lir, kong pangzüng nung vote 218 agüja pangzüng agizüktsü votes 226 nüngdaka aliba vote ti agi mabensa liasü.

Zelenskyy-i tang tashi parliament nung tzüzüng-ozüng balala agizüktsü asoshi züngsem timba dak metaloka alir, kechiaser par party nungi parliament züngsem peria bo teti malir.

Parliament teyari medeni Russia den yimjung ken o jembitsü mesüra US den raw materials agreement yanglutsü jembishinüba ya meinyaktettsü.

Palestine nunger 600 dak tema chioktsü atema nangzüktepogo: Hamas

Gaza City, Tsüklai/February 26 (Agencies): Israel-i taoba hopta chioktsü aliba Palestine nunger 620 menoa mechiokba dak sendakba nung tenangzüktepba ka yangluogo, ta Hamas-i metetdaktsü. Parnokibo ceasefire atema nangzükteper aliba nung shilem ka ama Gaza nungi Israel nunger trok chioka liasü.

Hamas-i Bodhbarnü sangdong ka ajanga, Israel-i Palestine tsür aser tanurtem timba tepuokdak nungi Brehostibarnü chioktsü aser kasa mapang nung parnoki Israel nunger tasümang pezü agütsütsü, ta ashi.

Al Jazeera osangbener Tareq Abu Azzoum-i central Gaza nung Nuseirat camp nungi ashiba agi, tepuokertem ya Brehostibarnü melenteptsü imlar aser telok anapronglai tenangzükba atalokdaktsütsü atema Egypt-i inyakyim achaayangtsü.

Honibarnü Palestine

nunger tepuoker 620 chioktsü aliba mechioki Gaza nung ceasefire atema tenangzüktepba yanglur aliba sülen manidakba atema Hamas-i Israel aija liasü. Kasa mapang nung Israel-ia tepuokertem mechiokba kuli agüja, Israel nunger tepuokertem chiokba mapang nüburtem aika adenshiba atema süoki ia bilemba lemsatepogo, aser Ato Kilonser Benjamin Netanyahu-i ashiba agi, iba inyakyim ya maksütsütsü asoshi lir.

Tang iba tenangzüktepba yangluba sülen telok anapronglai ceasefire mezügbuba shilem inyaktsü atema nangzükter aliba ajak tembanga inyaktsü. Tenangzüktepba kübok Palestine nunger tepuoker 2000 shi atema Hamas puri tasümang ti densema tepuoker 33 chioktsü liasü.

Washington indang Middle East envoy-i ashiba agi, Gaza

ceasefire tenangzüktepba kübok tanabuba shilem atema sensaksem asoshi inyakyim shitak dang odor. Mezügbuba shilem ya Honibarnü tembangtsü.

"Ken o aika tejakdangi bener odor. Asenok jembiba mapang Israel-i team ka yokdar," ta Steve Witkoff-i American Jewish Committee indang sentong ka nung jembiba mapang ashi.

"Doha mesüra Cairo nung sensaksem akatsü," ta paisa shisem. Sensaksem ya hopta ka tejakdang tenzükatoker alitsü liasü.

Witkoff-i ashiba agi, pai sensaksem tanabuba shilem tenzükdaktsüner, kong Hamas puri pua aliba Israel nunger tanungba chioktsü aser rara teti atema anentsü asoshi sensak asemtsü.

Abu Azzoum-i ashiba agi, Israel-i tanabuba shilem asoshi masü saka mezügbuba shilem atsülangtsü asoshiang merangdar.

Sudan military tayimtsü tsükokba nung asür 46 jungogo

Khartoum, Tsüklai/February 26 (Agencies): Sudan yimtiba Khartoum tezülen Omdurman yimti nung Sudan indang military tayimtsü ka tsükokba nung asür 46 jungogo, ta ketdangsürtemi metetdaktsü.

Antonov tayimtsü Mongolbar nü menor northern Omdurman nung Wadi Seidna military airport nungi yimketa atuba mapang tsükoka liasü.

Khartoum Media Office-i Bodhbarnü sangdong ka ajanga ashiba agi, tayimtsü tsükokba lendong nung ano nisung 10 yirua liasü.

Mezüngbo iba lendong nung nisung 19 asü ta health ministry-i metetdaktsür liasü. Ministry-isa, tayimtsü ya Omdurman kübok Karrari district nung civilian ki ka nung oa tsükok ta ashi.

Khartoum nung senior commander Major-General Bahr Ahmed-a asürtem rongnung densema liasü.

Sudan military shirnok paramilitary Rapid Support Forces (RSF) den 2023 küm April ita nungi rara arudar, parnoki iba lendong nung sepai aser civilian tem asüba jangjatsüogo aser

mibenertemi tayimtsü tsükokba tesem nung mi adokba temsepogo, ta metetdaktsü.

Tayimtsü ya kechi kodaser tsükok iba indang osang tejangja magütsü, saka military sources-i Reuters news agency dang ashiba agi, technical aibelen kar aliba ajanga tsükok asütsü.

Northern Omdurman nung alirtemi tayimtsü tsükokba tesem nung ola tulu adoka apokba osang agütsüogo, koba ajanga ki aika raksatsü aser iba temeket nung power maka kümdaktsü.

CLARK THEOLOGICAL COLLEGE

AOLIJEN, MOKOKCHUNG – 798601, NAGALAND

Advertisement for the Post of Work Supervisor and Driver

The Clark Theological College (CTC) hereby invites applicant for the post of Work Supervisor and Driver at CTC.

1. Basic Criteria for Work Supervisor:

● He/she must have a strong Christian commitment to serve the College.

● He/she must have a minimum qualification of graduate and above with some technical knowledge.

● Preferably, he/she must have some years of work experience in the relevant field.

2. Basic Criteria for Driver:

● He must have a strong Christian commitment to serve the College.

● Preferably, he must have some years of work experience in the relevant field and mechanical knowledge.

N.B.:

a) Salary : As per the CTC RoP 2019.

b) Interested candidate can submit their application with related documents on or before March 21, 2025 to the Principal, CTC, +91 8837002616 / ctcprin@gmail.com

c) Short listed candidates will be called for interview.

Sd/-

Prof. Rev. Dr. A. Temjen Jamir

Principal, CTC

Trained Nurses Association of India (TRAI)

Mokokchung Unit

KHUKHUA AITSÜR

SON District Hospital Dimapur nung 2nd year GNM azünger ka dak züka merenshiba atema TNAI Mokokchung Unit ajanga khukhua aitsü aser nursing azüngertem aser talisa healthcare workers takum kumzüka ayutsü atema tebilemstü lemsateper. Ozüng amshir dang tasü tait mapa inyaka ochi obendang agütsütsü ajungshir.

Sd/-

Tsupongtsüngla Jamir

President

Sd/-

Tiasenla

Gen. Secretary

GOVERNMENT OF NAGALAND

PERSONNEL & ADMINISTRATIVE REFORMS DEPARTMENT

ADMINISTRATIVE REFORMS BRANCH

NAGALAND: KOHIMA

Email:admreformsbranch@gmail.com

ADVERTISEMENT

Dated : Kohima, the 26th February 2025.

No.AR-8/NSSB-5/2020:In pursuance to Section 5 of the Nagaland Staff Selection Board Regulations, 2020, applications are invited for filling up the posts of Chairman and Member under Nagaland Staff Selection Board (NSSB), Government of Nagaland in the manner prescribed below:

NAME OF THE POST

: Item No.1 : 1 (one) post of Chairman

: Item No.2 : 1 (one) post of Member

ELIGIBILITY CRITERIA :

Item No.1: a) At least 30 years of experience in public administration, public service and academics for appointment to the post of Chairman provided that there should not have been any disciplinary action taken against them during their service.

Item No.2 : b) At least 25 years of experience in public administration, public service and academics for appointment to the post of Member provided that there should not have been any disciplinary action taken against them during their service.

For further details of terms of employment, please see NSSB regulations 2020 available in the Department's website dpar.nagaland.gov.in

a. While submitting the applications, the candidate is requested to submit biodata/ service details/ experience in proforma at Annexure-I attached which can be downloaded from the Department's website dpar.nagaland.gov.in.

b. Last date for submission of application shall be within 15 (Fifteen) days from the date of publication of this advertisement.

c. Online application will be accepted vide official email: admreformsbranch@gmail.com.

d. Only Indigenous Inhabitants of the Nagaland State can apply for the above posts as per the P & AR Department Notification No. AR-8/8/76 dated 28/04/1977.

Sd/-

Dr. J. ALAM, IAS

Chief Secretary to the Govt. of Nagaland

Jofra Archer-i otsü tasen ka yangluogo



Tsüklai/February 26, 2025 (Agencies): ICC Champions Trophy 2025 nung Afghanistan den Gaddafi Stadium nung asayaba mapang Jofra Archer-i otsü tasen ka yanglua pa England nung bowler tem rongnungi ODI nung wicket 50 takaratiba agiba asayar kümogo.

Asaya nung Archer-i asaya kanga junga tenzük aser yakta dang Afghanistan nung top order asayar asem out süja liasü.

Wicket asem agiba sülen pai ODI 30 nung dang wicket 50 agia England nung nungtugu asayar James Anderson

ajatetogo, shibai asaya 31 nung wicket 50 agia England indang record bener liasü.

Paisa, Steve Harmison (Asaya 32), Steven Finn (Asaya 33), aser Stuart Broad aser Darren Gough (asaya 34) nung ajatetogo.

Alima nung asayartem rongnung Sri Lanka nung Ajantha Mendis-i ODI nung wicket 50 takaratiba agir lir. Pai asaya 19 nung dang iba alizüng ya tongteta liasü. India nung rongnungia Ajit Agarkar-i ODI asaya 23 nung wicket 50 agir lir.

Asaya nung Afghanistan-i toss akokba sülen mezüng bat

asütsü shim saka powerplay nung parnoki asayar 3 out sür run 39 dang yanglutet. Archer-i strike batter Rahmanullah Gurbaz (6) kanga kara out sütsü aser iba sülen Sediqullah Atal (4) aser Rahmat Shah (4) nata out süja liasü.

Archer 2019 küm kanga junga asaya tenzük aser pai ODI nung wicket 23 agia aser England team-i World Cup akokba nunga tongtumbang shilem agi. Ajisüaka pa yiruba ajanga tetsükdaksü adoka liasü. Tetsükdaksü balala liaka pai iba otsü tasen yanglutetba ajanga pa sempet aser tanen makai merang asayaba sayur.

Liverpool coach Slot nem asaya ana atema tenokdangba agütsü

Tsüklai/February 26, 2025 (Agencies): Merseyside derby nung Everton den asayaba mapang match officials tem anema jenjang tamajung agiba atema Liverpool manager Arne Slot nem Bodhbarnü asaya ana atema tenokdangba agütsüogo. Slot-i pa aitsüba agizükogo, kong pai yimya masüba yimya benshiba, tangar mezüngmeshitsüsa o tamajung jembiba mesüra match referee aser assistant referee ka anema inyaksangshiba atema aitsüba shisema lir.

February 12 nü Goodison Park nung Liverpool aser Everton na asaya goal 2-2 agütsür tembangba mapang asaya tembangba sülen Slot-i match official anema jenjang agia liasü, ta Football Association-i ashi.

Asaya tembangba sülen pa


inyakyim atema Slot nem red card ka agütsü aser paia pa inyakyim atema sasaseta bilemba lemsatepogo.

Liverpool pur taruba domestic asaya ana ya Newcastle den Bodhbarnü aser Southampton den March 8 nü asayatsü lir. Asaya anaprongla ya Premier League asaya aser Anfield nung asayatsü.

Premier League nung Liverpool pur tang temaba jenjang nung lir aser parnok tanabuba jenjang nung aliba Arsenal dang nungi point 11 agi timba kümogo.

Taküm Premier League title atema Liverpool aser Arsenal na kanga toktepa asaya arudar, ajisüaka Arsenal pur tesüsabuba asaya nung West Ham-i goal ka agi akokba sülen title atema toktepa mapang parnok kanga akoksaogo.

Lionel Messi dang MLS-i senchi achi



Tsüklai/February 26, 2025 (Agencies): Honibarnü New York City den asayaba mapang support staff ka dak tekong nung tesülen nungi alenba atema Major League Soccer (MLS)-i Lionel Messi dang senchi achi.

Chase Stadium nung goal 2-2 agütsür asaya tembangba sülen iba ya ataloka liasü. Social media nung ayimsünga prokshiba video ka nung Messi-i NYCFC assistant coach Mehdi Ballouchy dak anaben tashi tekong nung kongshiba nguogo.

Referee den asatepba atema yellow card ka achiba sülen mapang tatsüka dang lir iba ya ataloka liasü.

MLS-i sangdong ka ajanga ashiba agi, parnok indang disciplinary committee-i, Messi-i league indang "Hands to the face/head/neck of an opponent" policy anema inyaksangshiba ngutetogo, ta jangjatsüogo.

Kasa mapang nung Messi indang teammate Luis Suarez, shibai asaya mezügbuba shilem tembangba sülen NYCFC nungi asayar Birk Risa dak kongshia liasü, pa danga senchi chiogo. Opang mepui asatepba mapang Suárez-i, Risa tekong nung kongshi aser iba sülen NYCFC nungi Strahinja Tanasijevi?-i bendangja liasü.

"Khen khenbo emotion azüoktsü tasak. Football asaya nung nenoki asayar aser asaya indang emotion angatetsü nüngdaker. Asayaba tesem nung kechi ataloker aji idakji dang toktsür," ya Inter Miami coach Javier Mascherano-i ashi.

Senchi chiaka Messi aser Suárez naprongla Mongolbarnü Inter Miami pur Kansas City den asaya nung asayaogo aser tenapronglai goal idakja Concacaf Champions Cup mezügbuba round nung Miami puri asaya tanabuba leg 4-1 aggregate agi kokogo.

ICC ODI Rankings: Virat Kohli top-5-i iogo

MEN'S ODI BATTING RANKINGS		
POS.	NAME	RATINGS
1.	SHUBMAN GILL	817
2.	BABAR AZAM	770
3.	ROHIT SHARMA	757
4.	HEINRICH KLAASEN	749
5.	VIRAT KOHLI	743
6.	DARYL MITCHELL	717
7.	HARRY TECTOR	713
8.	CHARITH ASALANKA	694
9.	SHREYAS IYER	679
10.	SHAI HOPE	672

Tsüklai/February 26, 2025 (Agencies): Tawa sayaba ICC Men's ODI batting rankings nung India nung asayar Virat Kohli top five-i ishiogo. Deobarnü Dubai nung ICC Champions Trophy asayaba mapang Pakistan den asaya nung ODI century 51buba yangluba sülen pa jenjang ka tejakdangi tua tang pongububa nung lir.

India nung asayar asem ODI rankings top five nung lir.

Shubman Gill temaba jenjang nung aser captain Rohit Sharma tasembuba jenjang nung lir.

Gill tanabuba jenjang nung alisang Babar Azam dang nungi rating point 47 agi timba kümogo.

ODI batters tem rongnung Kohli kija top 10 nung jenjang melenshiogo. Ajisüaka top 10 tema nung asayartem aika jenjang melenshiogo.

Will Young jenjang ti

tejakdangi tua tang 14buba, Ben Duckett jenjang 27 tejakdangi tua 17buba aser Rachin Ravindra jenjang 18 tejakdangi tu tang 24buba nung lir.

India nung asayar rongnungi KL Rahul-a jenjang ana tejakdangi tua tang 15buba nung lir aser South African Rassie van der Dussen 16bubai tuogo.

ODI bowling rankings nung Sri Lanka nung spinner Maheesh Theekshana maneni temaba jenjang nung lir aser Afghanistan nung bowler Rashid Khan tanabuba jenjang nung lir.

Top 10 nung South Africa nung Keshav Maharaj jenjang ka tejakdangi tua tang pezübuba nung lir. New Zealand nung Matt Henry-a jenjang ana tejakdangi tua trokbuba aser Australia nung Asam Zampa jenjang ana tejakdangi tua 10buba tongtetogo.

ODI all-rounders list nung Bracewell jenjang 26 tejakdangi tua tang 11buba nung lir. New Zealand nung Ravindra-a tang 15buba nung lir. All-rounders tem rongnung Afghanistan nung asayar Mohammad Nabi maneni temaba jenjang nung lir.

BILEMDANGANG

"Azümesen agi na mamokbangdang nai azümesen kottetang."